



INUIT ATAQATIGIIT INATSISARTUNI

Ulloq: 3. oktober 2008

Inatsisartut Suleriaasianni § 36, imm. 1 naapertorlugu Naalakkersuisunut apeqqutit imaattut matumuuna saqqummiuppakka:

(Inatsisartunut ilaasortaq Olga P. Berthelsen, Inuit Ataqatigiit)

1. Maannamut Tuapannguani najugaqarsimasut, isaterinerullu kingorna inissianut allanut nuutsinneqarsimasut qassit, inissiarsuit nappaqqinneqarnerini Tuapannguanut uteqqittussanngorpat?
2. Inissiarsuit nappaqqinneqarlutik naammassilernerini, kvadrat-meter-mut akia qanoq annertutigiva?
3. Radio-p Qaqaani inissiarsuit nutarterneqarlutik aallartinneqassappata, inissianik attartortut sumut allamut inissinneqassanersut, siusinaarluni misissorneqareerpa?
4. Siunissaq ungasinnerulaartoq eqqarsaatigalugu, Nuummi inissianik sumiittuni isaterinissamik pilersaaruteqarpisi?
5. Inissiarsuarnik isateraluni nappaqqiisarnerup, kingunerisaanik nalinnaasumik inissianik attartorniartunut, utaqqisarneq qanoq sivilutigilerpa?

Tunngavilersuut:

Tuapannguit isaterneqarnissaat pilersaaruserineqalermat nalunaaritigineqarpoq, inissiarsuarni taakkunani attartortuusut 30%-iisa missaat, piginneqatigiillutik inissiatileqatigiiffimmut ilanngullutik uteqqikkumaartut. Taassumap eqquussimanera paaserusunnarpoq ilumoorsimanersoq.

Taassumap saniatigut aamma taamanikkut nalunaarutigineqarpoq, inissiarsuit nappaqqinneqarnerminni kvadrat-meter-mut 15.000 tungaanut akeqartussaasut. Ullumikkut inissialiernerup akii eqqarsaatigalugit, qanoq nikittoqartigisimanersoq paaserusunnarpoq.

Ullumikkut Nuuk eqqarsaatigalugu inissianik nalinnaasumik, attartorniarlutik utaqqisut amerlasoorpassuupput. Inissiat tamangajalluinnarmik atorneqarput. Taamaattumik paaserusunnarpoq inuit, inissianik attartortuusut sumut allamut nuutsinniarneqarnersut. Tamanna utaqqisut utaqqinerinut sunniuteqarsinnaalluarpoq.

Ukiunut tulliuttunut inissialiornissanut pilersaarutit eqqarsaatigalugit, piginneqatigiilluni illuliorititsinerit kisingajammik eqqarsaatigineqarput. Inuit piginneqatigiilluni inissianik piginneqataanissaminnut akissaqanngitsut, tassaalersussaapput inissaaleqisut. Taakkua sumut pisinneqassagamik??

Inissiaruarnik isaterinerit siunissaq eqqarsaatigalugu taamaattussaannanngorsimasutut isikkoqarpoq. Tamanna tunngavigalugu inuiaqatigiit pisariaqartippaat, inissiaqarnermut tunngatillugu siunissami qanoq inissisimasoqarnerseq paasissallugu.